

SYAWALAN PADUKUHAN KEDUNGTANGKIL

Assalamu'alaikum Wr. Wb.

Innalhamdalillah Nahmatuhu Wanasta'inuhu Wana'udzubillahiminsyuruurianfusina Wamin Syayyiaatia'malina Mayyadhillahu falaamudhillalah Wamaayuddil Falla haadiallah, Asyhadualla illaahailallahu wa asyhaduanna Muhammadan abduhu warosuluhu laa nabiaba'dah.

Dhumateng panjenenganipun Bapak Kyai Amin Ma`ruf ingkang dahat kinurmatan
Dhumateng para sesepuh dalasan pinisepuh ingkang satuhu kinabekten
Para alim, ulama ingkang satuhu kita bektosi.
Dhumateng Bapak Dukuh Kedungtangkil ingkang dahat kinurmatan
Hadirin wal hadirat rokhimakumullah
Saha para kadang wiranem ingkang bagya mulya

Minangka purwakaning atur, sumangga kula panjenengan sami ngaturaken puji syukur dhumateng ngarsanipun Gusti Allah SWT awit sampun paring mapinten-pinten karohmatan saha kasaenan dhumateng kula panjenengan sami, satemah wonten ing enjang menika kula panjenengan sami saged kempal wonten ing balai padukuhan Kedungtangkil saperlu hangestreni adicara Syawalan Padukuhan Kedungtangkil kanthi sae, nir ing sambekala.

Sholawat dalah salam mugi tansah katetepaken dhumateng panjenenganipun Nabi Agung Muhammad SAW, para kulawarga, sahabat, saha para penerusipun, Insya Allah dhumateng kula panjenengan sami ingkang tansah mawantu-wantu syafa'atipun wonten ing Yaumul Akhir. Aamiin Yaa Rabbal'alamin

Bapak Ibu ingkang kula urmati. Nyuwun pangapunten, keparenga kula kekalih kumawantun ngadeg wonten ngarsanipun panjenengan sami, awit kula ingkang kajibah ndherekaken lampahing adicara syawalan ing enjang menika.

Saderengipun adicara kawiwitan keparenga kula ngaturaken urutan reroncening adicara wonten ing wekdal menika.

1. Pambuka
2. Waosan Kalam Illahi ingkang badhe dipunwaosaken dening sedherek Ahmad Burhan Baihaqi.
3. Atur sapala saking ketua panitia, ingkang badhe dipunsalirani dening Bapak Rakidi.
4. Ikrar syawalan dening Bapak Suyatman.

5. Tausyiah ingkang badhe dipunandharaken dening Bapak Kyai Amin Ma`ruf pengasuh Pondok Pesantren Al-Ma`ruf Kalimenur

6. Panutup

Mekaten wau menggah urut reroncening adicara ingkang badhe lumampah wonten ing wekdal menika.

Tumapak adicara ingkang sepisan inggih menika pambuka. Sumangga adicara syawalan wonten ing enjing menika dipunwiwiti kanthi waosan basmalah sesarengan. Bismillahirrohmanirrohim.

Mugi-mugi kanthi waosan basmalah kala wau sageda mahanani rancaging adicara ing wekdal menika.

Hadirin wal hadirat rahimakumullah. Adicara ingkang salajengipun inggih menika waosan Kalam Illahi, Dhumateng Fakhri Ahmad Burhan Baihaqi kula sumanggakaken.

Maturnuwun, mugi-mugi waosan ayat suci Al-Qur'an wau saged dados amal kesaenan dhumateng kula panjenengan sami, mliginipun dhumateng ingkang maosaken. Aamiin.

Tumapak adicara ingkang angka tiga, atur sapala saking ketua panitia. Dhumateng Bapak Rakidi kula sumanggakaken.

Maturnuwun dhumateng Bapak Rakidi ingkang sampun paring sambutan.

Sumene sakwentawis kadang taruno mudo ngaturaken unjukan

Bapak ibu ingkang kula urmati, saha para kanca ingkang bagya mulya.

Tumapak adicara ingkang angka sekawan inggih menika Ikrar Syawalan ingkang badhe dipunwaosaken dening Bapak Suyatman. Dhumateng Bapak Suyatman, kula sumanggakaken.

Alhamdulillahirobbil'alamin, adicara ikrar sampun kalampahan sareng-sareng. Mugi-mugi lumantar waosan ikrar kala wau kula panjenengan sami sageda wangsul ing kafitran, sami dipunlebur kalepatanipun dening Gusti, saha saged tansah njagi silaturahmi kaliyan sesami. Aamiin.

Hadirin wal hadirat rokhimakumullah. Tumapak adicara ingkang salajengipun inggih menika tausyiah ingkang badhe dipunandharaken dening Bapak Kyai Amin Ma`ruf, Pengasuh Pondok Pesantren Al-Ma`ruf Kalimenur. Dhumateng panjenenganipun Bapak Kyai Amin Ma`ruf, wekdal saha papan kula sumanggakaken.

Maturnuwun kaaturaken dhumateng Bapak Kyai Amin Ma`ruf, ingkang sampun kersa paring tausyiah. Mugi mugi amal kasaenan panjenengan sageda pikantuk piwales ingkang tanpa winates saking Gusti Allah SWT, semanten ugi dhumateng kula panjenengan sedaya ingkang sami midhangetaken. Aamiin

Bapak Ibu ingkang kula urmati, saha para kanca ingkang bagya mulya.

Mekaten kala wau adicara syawalan ingkang dipunwontenaken ing enjing menika sampun kalampahan. Mugi-mugi adicara menika saged paring mumpangat, saha saged ningkataken iman lan taqwa kula panjenengan sedaya dhumateng Allah SWT. Aamiin Yaa Rob.

Saderengipun adicara ing enjing menika dipunpungkasi, mbok bilih kula kekalih sadangunipun ndherekaken adicara kathah kalepatan ing basa, tata karma saha tata trapsila, kula kekalih nyuwun lumunturing sih samodra pangaksami.

.....

Ing wusana, sumangga adicara syawalan ing siang menika katutup kanthi waosan Hamdallah sesarengan.

Alhamdulillahirobbil'amin.

Akhirul Kalam, Wassalamu'alaikum Wr. Wb.

Maturnuwun, sugeng kondur mugi rahayu ingkang sami pinanggih.